

## D'Tierkei gehéiert nët an d'EU!

*Pressematdeelung vum 2. August 2016*

D'Tierkei gehéiert net an d'EU, dat ass déi konstant Positioun vun der ADR. Déi rezent politesch Onrouen, d'Ofdrifte vum Land a Richtung Diktatur, déi laang Geschicht vu Putschen a politeschen Onrouen a Korruptioun a net zu Lescht d'Relatioun vun der Tierkei mat Griicheland and d'militäresch Besetzung vun engem Deel vun Zypern ginn eis an dëser Positioun Recht. Dat verhënnert net, dem Land tëscht Europa an Asien Rechter als privilegierten Handelspartner ze ginn. An dat setzt och net dem Nato-Member Tierkei seng wichteg Roll am militäresche Beräich erof.

Dofir fuerdert d'ADR, datt d'Verhandlungen iwver eng EU-Memberschaft vun der Tierkei elo definitiv ofgebrach ginn. Et gëtt Zäit, der Tierkei endlech d'Wourecht ze soen, amplaz datt dat Land elo iwver 50 Joer bal ouni Resultat a Verhandlung mat der Europäescher Gemeinschaft ass.

An där aktueller Situatioun ass d'ADR besonnesch besuert iwver d'Entwécklung vun de Mënscherechter nom Putsch: Gewalt, Folter, Aschränkung vun de Mënscherechter a vun der Pressefräiheet, Ofschafung vun der Gewaltentrennung, massiv Entloossungen am öffentlechen Déngscht, och an der Justiz, a Repressiounen a Pressiounen gehéieren net an e Staat, dee vu sech behaupt, e Rechtsstaat wëllen ze sinn.

D'ADR fuerdert och, datt d'Tierkei hire Flichte beim Schutz an der Kontroll vun hire Grenzen nokënnt an net duerch eegen Negligence d'Paarte fir Flüchtlinge wäit opmécht.

D'ADR ënnersträicht och, datt si géint eng Visafräiheet fir Leit mat engem tierkesche Pass ass. D'Tierkei ass all Dag méi wäit dovun ewech, fir och nëmmen déi minimal Konditiounen fir esou eng Visafräiheet ze erfëllen.

An deem Kontext begrëisse mir déi rezent Kritik un der Tierkei aus de Reie vun der CSV. Déi Partei schéngt eng Kéier ze huelen. elo wou si ufänkt, net méi fir en onbedéngten tierkesche Bäitritt an d'EU anzutrieden an op d'mannst en temporäre Stopp vun de Verhandlung fuerdert. Dat ass e Schrack an déi richteg Richtung. Et misst een awer nach wëssen, ob dat Eenzelmeenunge sinn, oder ob dat d'Meenung vun där ganzer Partei ass.